

史記

五

點校本二十四史修訂本

中華書局

〔漢〕司馬遷 撰
〔宋〕裴駰 集解
〔唐〕司馬貞 索隱
〔唐〕張守節 正義

史記

點校本
二十四史
修訂本

第五卷
第三一至卷四二
冊

中華書局

史記卷三十一

吳太伯世家第一

索隱系家者，記諸侯本系也，言其下及子孫常有國。故孟子曰「陳仲子，齊之系家」。又董仲舒曰「王者封諸侯，非官之也，得以代爲家也」。

吳太伯，一太伯弟仲雍，二皆周太王之子，而王季歷之兄也。季歷賢，而有聖子昌，太王欲立季歷以及昌，於是太伯、仲雍二人乃奔荆蠻，文身斷髮，示不可用，三以避季歷。季歷果立，是爲王季，而昌爲文王。太伯之奔荆蠻，自號句吳。一四荆蠻義之，從而歸之千餘家，立爲吳太伯。

一 二 集解 韋昭曰：「後武王追封爲吳伯，故曰吳太伯。」

索隱 國語曰黃池之會，晉定公使謂吳王夫

差曰「夫命圭有命，固曰吳伯，不曰吳王」，是吳本伯爵也。范甯解論語曰「太者，善大之稱；伯者，長也。周太王之元子，故曰太伯」。稱仲雍、季歷，皆以字配名，則伯亦是字，又是爵，但其

名史籍先闕耳。

正義吳，國號也。

太伯居梅里，在常州無錫縣東南六十里。至十九世孫壽

夢居之，號句吳。壽夢卒，諸樊南徙吳。至二十一代孫光，使子胥築闔閭城都之，今蘇州也。

〔二〕索隱伯、仲、季是兄弟次第之字。若表德之字，意義與名相符，則系本曰「吳孰哉居蕃離」，宋

忠曰「孰哉，仲雍字。蕃離，今吳之餘暨也」。解者云雍是熟食，故曰雍字孰哉也。

〔三〕集解應劭曰：「常在水中，故斷其髮，文其身，以象龍子，故不見傷害。」正義江熙云：「太

伯少弟季歷生文王昌，有聖德，太伯知其必有天下，故欲傳國於季歷。以太王病，託採藥於吳

越，不反。太王薨而季歷立，一讓也；季歷薨而文王立，二讓也；文王薨而武王立，遂有天下，

三讓也。又釋云：「太王病，託採藥，生不事之以禮，一讓也；太王薨而不反，使季歷主喪，不葬

之以禮，二讓也；斷髮文身，示不可用，使歷主祭祀，不祭之以禮，三讓也。」

〔四〕集解宋忠曰：「句吳，太伯始所居地名。」索隱荆者，楚之舊號，以州而言之曰荆。蠻者，閩

也，南夷之名；蠻亦稱越。此言自號「句吳」，吳名起於太伯，明以前未有吳號。地在楚越之

界，故稱「荆蠻」。顏師古注漢書，以吳言「句」者，夷語之發聲，猶言「於越」耳。此言「號句

吳」，當如顏解。而注引宋忠以爲地名者，系本居篇曰「孰哉居蕃離，孰姑徙句吳」，宋氏見史

記有「太伯自號句吳」之文，遂彌縫解彼云是太伯始所居地名。裴氏引之，恐非其義。蕃離既

有其地，句吳何總不知真實？吳人（一）不聞別有城邑曾名句吳，則系本之文或難依信。吳地

記曰：「泰伯居梅里，在闔閭城北五十里許。」

太伯卒，^{一二}無子，弟仲雍立，是爲吳仲雍。仲雍卒，^{二三}子季簡立。季簡卒，子叔達立。叔達卒，子周章立。是時周武王克殷，求太伯、仲雍之後，得周章。周章已君吳，因而封之。乃封周章弟虞仲於周之北故夏虛，^{一三}是爲虞仲，^{一四}列爲諸侯。

【一】集解 皇覽曰：「太伯冢在吳縣北梅里聚，去城十里。」

【二】索隱 吳地記曰：「仲雍冢在吳郡常孰縣西海虞山上，^二，與言偃冢並列。」

【三】集解 徐廣曰：「在河東大陽縣。」

【四】索隱 夏都安邑，虞仲都大陽之虞城，在安邑南，故曰夏虛。左傳曰「太伯、虞仲，太王之昭」，則虞仲是太王之子必也。又論語稱「虞仲、夷逸隱居放言」，是仲雍稱虞仲。今周章之弟亦稱虞仲者，蓋周章之弟字仲，始封於虞，故曰虞仲。則仲雍本字仲，而爲虞之始祖，故後代亦稱虞仲，所以祖與孫同號也。

周章卒，子熊遂立。熊遂卒，子柯相立。^{一二}柯相卒，子彊鳩夷立。彊鳩夷卒，子餘橋疑立。^{二三}餘橋疑吾卒，子柯盧立。柯盧卒，子周繇立。^{三三}周繇卒，子屈羽立。^{四四}屈羽卒，子夷吾立。夷吾卒，子禽處立。禽處卒，子轉立。^{五五}轉立卒，子頗高立。^{六六}頗高卒，子句卑立。^{七七}是時晉獻公滅周北虞公，以開晉伐虢也。^{八八}句卑卒，子去齊立。去齊卒，子壽夢立。^{九九}壽夢立而吳始益大，稱王。

【一】正義柯音歌。相音相匠反。

【二】正義橋音驕驕反。

【三】正義繇音遙，又音由。

【四】正義屈，居勿反。

【五】索隱譙周古史考云「柯轉」。

【六】索隱古史考作「頗夢」。

【七】索隱古史考云「畢軫」。

【八】索隱春秋經僖公五年「冬，晉人執虞公」。左氏二年傳曰「晉荀息請以屈產之乘與垂棘之璧假道伐虢，宮之奇諫，不聽。虞公許之，且請先伐之，遂伐虢，滅下陽」。五年傳曰「晉侯復假道伐虢，宮之奇諫，不聽。以其族行，曰『虞不臘矣』」。八月甲午，晉侯圍上陽。冬十有二月，滅虢。師還，遂襲虞，滅之」也。

【九】正義夢，莫公反。

自太伯作吳，五世而武王克殷，封其後爲二：其一虞，在中國；其一吳，在夷蠻。十二世而晉滅中國之虞。中國之虞滅二世，而夷蠻之吳興。一二大凡從太伯至壽夢十九世。【二】

〔一〕正義中國之虞滅後二世，合七十一年，至壽夢而興大，稱王。

〔二〕索隱壽夢是仲雍十九代孫也〔三〕。

王壽夢二年，〔一〕楚之亡大夫申公巫臣怨楚將子反而奔晉，自晉使吳，教吳用兵乘車，令其子爲吳行人，〔二〕吳於是始通於中國。吳伐楚。十六年，楚共王伐吳，至衡山。〔三〕

〔一〕索隱自壽夢已下始有其年，春秋唯記卒年。計二年當成七年也。

〔二〕集解服虔曰：「行人，掌國賓客之禮籍，以待四方之使，賓大客，受小客之幣辭。」索隱左傳

魯成二年曰「巫臣使齊，及鄭，使介反幣，而以夏姬行，遂奔晉」。七年傳曰「子重、子反殺巫臣之族而分其室，巫臣遺二子書曰『余必使爾罷於奔命以死』」。巫臣使於吳，吳子壽夢悅之，乃通吳于晉，教吳乘車，教之戰陣，教之叛楚，實其子狐庸焉，使爲行人。吳始伐楚，伐巢，伐徐。馬陵之會，吳人州來，子重、子反於是乎一歲七奔命」是。

〔三〕集解杜預曰：「吳興烏程縣南也。」索隱春秋經襄三年「楚公子嬰齊帥師伐吳」，左傳曰

「楚子重伐吳，爲簡之師，克鳩茲，至于衡山」也。

二十五年，王壽夢卒。〔一〕壽夢有子四人，長曰諸樊，〔二〕次曰餘祭，次曰餘昧，〔三〕次曰季札。〔四〕季札賢，而壽夢欲立之，季札讓不可，於是乃立長子諸樊，攝行事當國。

〔一〕索隱襄十二年經曰「秋九月，吳子乘卒」。左傳曰壽夢。計從成六年至此，正二十五年。系本曰「吳孰姑徙句吳」。宋忠曰「孰姑，壽夢也」。代謂祝夢乘諸也。「壽」「孰」音相近，「姑」之言諸也，毛詩傳讀「姑」爲「諸」，知孰姑壽夢是一人，又名乘也。

〔二〕索隱春秋經書「吳子遏」，左傳稱「諸樊」，蓋遏是其名，諸樊是其號。公羊傳「遏」作「謁」。

〔三〕索隱左傳曰「闔戕戴吳」。杜預曰「戴吳，餘祭也」。又襄二十八年左傳，齊慶封奔吳，句餘與之朱方。杜預曰「句餘，吳子夷末也」。計餘祭以襄二十九年卒，則二十八年賜慶封邑，不得是夷末。且句餘餘祭或謂是一人〔四〕，夷末惟史記、公羊作「餘昧」〔五〕，左氏及穀梁並爲「餘祭」〔六〕。「夷末」「句餘」音字各異，不得爲一，或杜氏誤耳。正義祭，側界反。昧，莫葛反。

〔四〕索隱公羊傳曰：「謁也，餘祭也，夷末也，與季子同母者四人。季子弱而才，兄弟皆愛之，同欲以爲君〔七〕，兄弟遞相爲君，而致國乎季子。故謁也死，餘祭也立；餘祭也死，夷末也立；夷末也死，則國宜之季子，季子使而亡焉。僚者，長庶也，即之。闔閭曰：『將從先君之命與，則國宜之季子也；如不從君之命，則宜立者我也。僚惡得爲君乎？』於是使專諸刺僚。」史記壽夢四子，亦約公羊文，但以僚爲餘昧子爲異耳。左氏其文不明，服虔用公羊，杜預依史記及吳越春秋。下注徐廣引系本曰「夷昧生光〔八〕」，檢系本今無此語〔九〕。然按左氏狐庸對趙文子〔一〇〕，謂「夷末甚德而度，其天所啓也，必此君之子孫實終之」。若以僚爲末子，不應此言。又光言「我王嗣」，則光是夷昧子〔一一〕，且明是庶子。

王諸樊元年，二諸樊已除喪，讓位季札。季札謝曰：「曹宣公之卒也，諸侯與曹人不義曹君，三將立子臧，子臧去之，以成曹君，三君子曰『四能守節矣』。君義嗣，一五誰敢干君！有國，非吾節也。札雖不材，願附於子臧之義。」吳人固立季札，季札弃其室而耕，乃舍之。一六秋，吳伐楚，楚敗我師。四年，晉平公初立。一七

〔一〕集解 世本曰「諸樊徙吳」也。

〔二〕集解 服虔曰：「宣公，曹伯廬也，以魯成公十三年會晉侯伐秦，卒于師。曹君，公子負芻也。負芻在國，聞宣公卒，殺太子而自立，故曰不義之也。」

〔三〕集解 服虔曰：「子臧，負芻庶兄。」索隱成十三年左傳曰：「曹宣公卒于師。曹人使公子負芻守，使公子欣時逆喪。秋，負芻殺其太子而自立。」杜預曰：「皆宣公庶子也。負芻，成公也。欣時，子臧也。十五年傳曰：「會于戚，討曹成公也，執而歸諸京師。諸侯將見子臧於王而立之。」子臧曰：『前志有之曰：「聖達節，杜預曰：聖人應天命，不拘常禮也。次守節，杜預曰：謂賢者也。下失節。杜預曰：愚者妄動也。』爲君，非吾節也。雖不能聖，敢失守乎？』遂逃，奔宋。」

〔四〕索隱 君子者，左丘明所爲史評仲尼之詞，指仲尼爲君子也。

〔五〕集解 王肅曰：「義，宜也。嫡子嗣國，得禮之宜。」杜預曰：「諸樊嫡子，故曰義嗣。」

〔六〕索隱 「諸樊元年已除喪」至「乃舍之」，皆襄十四年左氏傳文。正義 舍音捨。

〔七〕索隱左傳襄十六年春「葬晉悼公，平公即位」是也。

十三年，王諸樊卒。〔一〕有命授弟餘祭，欲傳以次，必致國於季札而止，以稱先王壽夢之意，且嘉季札之義，兄弟皆欲致國，令以漸至焉。季札封於延陵，〔二〕故號曰延陵季子。

〔一〕索隱春秋經襄二十五年：「十有二月，吳子遏伐楚，門于巢，卒。」左傳曰：「吳子諸樊伐楚，以報舟師之役，門于巢。巢牛臣曰：『吳王勇而輕，若啓之，將親門。我獲射之，必殪。是君也死，疆其少安。』從之。吳子門焉，牛臣隱於短牆以射之，卒。」

〔二〕索隱襄三十一年左傳趙文子問於屈狐庸曰「延州來季子其果立乎」，杜預曰「延州來，季札邑也」。昭二十七年左傳曰「吳子使延州來季子聘于上國」，杜預曰「季子本封延陵，後復封州來，故曰延州來」。成七年左傳曰「吳人州來」，杜預曰「州來，楚邑，淮南下蔡縣是」。昭十三年傳「吳滅州來」〔三〕，二十三年傳「吳伐州來」〔三〕。則州來本爲楚邑，吳光伐滅，遂以封季子也。地理志云會稽毗陵縣，季札所居。太康地理志曰「故延陵邑，季札所居，栗頭有季札祠」。地理志沛郡下蔡縣云「古州來國，爲楚所滅，後吳取之，至夫差遷昭侯於此」。公羊傳曰「季子去之延陵，終身不入吳國」，何休曰「不入吳朝廷也」。此云「封於延陵」，謂因而賜之以菜邑。而杜預春秋釋例土地名則云「延州來，闕」，不知何故而爲此言也。

王餘祭三年，齊相慶封有罪，自齊來奔吳。吳子慶封朱方之縣，〔一〕以爲奉邑，以女妻

之，富於在齊。

「二」集解 吳地記曰：「朱方，秦改曰丹徒。」

四年，吳使季札聘於魯，一請觀周樂。二爲歌周南、召南。三曰：「美哉，始基之矣，四猶未也。五然勤而不怨。」六歌邶、鄘、衛。七曰：「美哉，淵乎，憂而不困者也。」八吾聞衛康叔、武公之德如是，是其衛風乎？」九歌王。一〇曰：「美哉，思而不懼，其周之東乎？」二歌鄭。三曰：「其細已甚，民不堪也，是其先亡乎？」三歌齊。曰：「美哉，泱泱乎，大風也哉。」四表東海者，其太公乎？」五國未可量也。」六歌豳。曰：「美哉，蕩蕩乎，樂而不淫，七其周公之東乎？」八歌秦。曰：「此之謂夏聲。夫能夏則大，大之至也，其周之舊乎？」九歌魏。曰：「美哉，颯颯乎，一〇大而寬，一四，一三儉而易行，以德輔此，則盟主也。」三歌唐。曰：「思深哉，其有陶唐氏之遺風乎？不然，何憂之遠也？」三非令德之後，誰能若是！」歌陳。曰：「國無主，其能久乎？」四自鄘以下，無譏焉。五歌小雅。六曰：「美哉，思而不貳，七怨而不言，八其周德之衰乎？」九猶有先王之遺民也。」三〇歌大雅。三一曰：「廣哉，熙熙乎，三二曲而有直體，三三其文王之德乎？」歌頌。三四曰：「至矣哉，三五直而不倨，三六曲而不詘，三七近而不偪，三八遠而不

攜，^{〔三五〕}遷而不淫，^{〔四〇〕}復而不厭，^{〔四二〕}哀而不愁，^{〔四三〕}樂而不荒，^{〔四四〕}用而不匱，^{〔四五〕}廣而不宣，^{〔四六〕}施而不費，^{〔四七〕}取而不貪，^{〔四八〕}處而不底，^{〔四九〕}行而不流。^{〔五〇〕}五聲和，八風平，^{〔五一〕}節有度，守有序，^{〔五二〕}盛德之所同也。^{〔五三〕}見舞象箏、南籥者，^{〔五四〕}曰：「美哉，猶有感。」^{〔五五〕}見舞大武，^{〔五六〕}曰：「美哉，周之盛也，其若此乎？」^{〔五七〕}見舞韶護者，^{〔五八〕}曰：「聖人之弘也，^{〔五九〕}猶有慙德，聖人之難也！」^{〔六〇〕}見舞大夏，^{〔六一〕}曰：「美哉，勤而不德！」^{〔六二〕}非禹，其誰能及之？^{〔六三〕}見舞招箏，^{〔六四〕}曰：「德至矣哉，大矣，^{〔六五〕}如天之無不燾也，^{〔六六〕}如地之無不載也，雖甚盛德，無以加矣。觀止矣，若有他樂，吾不敢觀。」^{〔六七〕}

〔一〕集解 在春秋魯襄公二十九年。

〔二〕集解 服虔曰：「周樂，魯所受四代之樂也。」杜預曰：「魯以周公故，有天子禮樂。」

〔三〕集解 杜預曰：「此皆各依其本國歌所常用聲曲。」

〔四〕集解 王肅曰：「言始造王基也。」

〔五〕集解 賈逵曰：「言未有雅、頌之成功也。」杜預曰：「猶有商紂，未盡善也。」

〔六〕集解 杜預曰：「未能安樂，然其音不怨怒。」

〔七〕集解 杜預曰：「武王伐紂，分其地爲三監。三監叛，周公滅之，并三監之地，更封康叔，故三國盡被康叔之化。」

【八】集解 賈逵曰：「淵，深也。」杜預曰：「亡國之音哀以思，其民困。衛康叔、武公德化深遠，雖遭宣公淫亂，懿公滅亡，民猶秉義，不至於困。」

【九】集解 賈逵曰：「康叔遭管叔、蔡叔之難，武公罹幽王、褒姒之憂，故曰康叔、武公之德如是。」杜預曰：「康叔、武公，皆衛之令德君也。聽聲以爲別，故有疑言。」

【一〇】集解 服虔曰：「王室當在雅，衰微而列在風，故國人猶尊之，故稱王，猶春秋之『王人』也。」杜預曰：「王，黍離也。」

【一一】集解 服虔曰：「平王東遷雒邑。」杜預曰：「宗周殞滅，故憂思；猶有先王之遺風，故不懼也。」正義 思音肆。

【一二】集解 賈逵曰：「鄭風，東鄭是。」

【一三】集解 服虔曰：「其風細弱已甚，攝於大國之間，無遠慮持久之風，故曰民不堪，將先亡也。」

【一四】集解 服虔曰：「泱泱，舒緩深遠，有大和之意。其詩風刺，辭約而義微，體疏而不切，故曰大風。」索隱 泱，於良反。泱泱猶汪洋洋洋，美盛貌也。杜預曰「弘大之聲」也。

【一五】集解 王肅曰：「言爲東海之表式。」

【一六】集解 服虔曰：「國之興衰，世數長短，未可量也。」杜預曰：「言其或將復興。」

【一七】集解 賈逵曰：「蕩然無憂，自樂而不荒淫也。」

【一八】集解 杜預曰：「周公遭管、蔡之變，東征，爲成王陳后稷先公不敢荒淫，以成王業，故言其周公

東乎〔二五〕。」

〔二九〕集解 杜預曰：「秦仲始有車馬禮樂，去戎狄之音，而有諸夏之聲，故謂之夏聲。及襄公佐周平王東遷而受其故地，故曰周之舊也。」

〔三〇〕索隱 颶音馮，又音泛。杜預曰：「中庸之聲。」

〔三一〕索隱 左傳作「大而婉」。杜預曰：「婉，約也。大而約，則儉節易行。」「寬」字宜讀爲「婉」也。

〔三二〕集解 徐廣曰：「盟，一作『明』。」駟案：賈逵曰「其志大，直而有曲體，歸中和。中庸之德，難成而實易行。故曰以德輔此，則盟主也」。杜預曰「惜其國小而無明君」。

曰「盟，一作『明』」。按：左傳亦作「明」，此以聽聲知政，言其明聽耳，非盟會也。

〔三三〕集解 杜預曰：「晉本唐國，故有堯之遺風。憂深思遠，情發於聲也。」

〔三四〕集解 杜預曰：「淫聲放蕩，無所畏忌，故曰國無主。」

〔三五〕集解 服虔曰：「鄆以下，及曹風也。其國小，無所刺譏。」

〔三六〕集解 杜預曰：「小雅，小正，亦樂歌之章〔二六〕。」

〔三七〕集解 杜預曰：「思文、武之德，無貳叛之心也。」

〔三八〕集解 王肅曰：「非不能言，畏罪咎也。」

〔三九〕集解 杜預曰：「衰，小也。」

〔四〇〕集解 杜預曰：「謂有殷王餘俗，故未大衰〔二七〕。」

【三】集解 杜預曰：「大雅，陳文王之德，以正天下。」

【三】集解 杜預曰：「熙熙，和樂聲。」

【三】集解 杜預曰：「論其聲。」

【四】集解 杜預曰：「頌者，以其成功告於神明。」

【五】集解 賈逵曰：「言道備至也。」

【六】集解 杜預曰：「倨，傲也。」

【七】集解 杜預曰：「訕，撓也。」

【八】集解 杜預曰：「謙退也。」

【九】集解 杜預曰：「攜，貳也。」

【四〇】集解 服虔曰：「遷，徙也。」文王徙鄆，武王居鄙。」杜預曰：「淫，過蕩也。」

【四一】集解 杜預曰：「常日新也。」

【四二】集解 杜預曰：「知命也。」

【四三】集解 杜預曰：「節之以禮也。」

【四四】集解 杜預曰：「德弘大。」

【四五】集解 杜預曰：「不自顯也。」

【四六】集解 杜預曰：「因民所利而利之。」

【四七】集解 杜預曰：「義然後取。」

【四八】集解 杜預曰：「守之以道。」

【四九】集解 杜預曰：「制之以義。」

【五〇】集解 杜預曰：「宮、商、角、徵、羽謂之五聲。八方之氣謂之八風。」

【五一】集解 杜預曰：「八音克諧，節有度也。無相奪倫，守有序也。」

【五二】集解 杜預曰：「頌有殷、魯，故曰盛德之所同。」

【五三】集解 賈逵曰：「象，文王之樂武象也。節，舞曲也。南籥，以籥舞也。」 索隱 節音朔，又素

交反。

【五四】集解 服虔曰：「憾，恨也。恨不及己以伐紂而致太平也。」 索隱 「憾」讀爲「憾」，字省耳，胡

暗反。

【五五】集解 賈逵曰：「大武，周公所作武王樂也。」

【五六】集解 賈逵曰：「韶護，殷成湯樂大護也。」

【五七】集解 賈逵曰：「弘，大也。」

【五八】集解 服虔曰：「慙於始伐而無聖佐，故曰聖人之難也。」

【五九】集解 賈逵曰：「夏禹之樂大夏也。」

【六〇】集解服虔曰：「禹勤其身以治水土也。」

【六一】集解服虔曰：「有虞氏之樂大韶也。」索隱「韶」字體變耳。

【六二】集解服虔曰：「至，帝王之道極於韶也，盡美盡善也。」

【六三】集解賈逵曰：「燾，覆也。」

【六四】集解服虔曰：「周用六代之樂，堯曰咸池，黃帝曰雲門。魯受四代，下周二等，故不舞其二。

季札知之，故曰有他樂吾不敢請。」

去魯，遂使齊。說晏平仲曰：「子速納邑與政。」（一）無邑無政，乃免於難。齊國之政將有所歸，未得所歸，難未息也。」故晏子因陳桓子以納政與邑，是以免於樂高之難。（二）

【一二】集解服虔曰：「人邑與政職於公，不與國家之事。」

【一三】集解難在魯昭公八年。正義難，乃憚反。在魯昭公八年。樂施、高彊二氏作難，陳桓子和

之乃解也。

去齊，使於鄭。見子產，如舊交。謂子產曰：「鄭之執政侈，難將至矣，政必及子。子爲政，慎以禮。」（一）不然，鄭國將敗。」去鄭，適衛。說蘧瑗、史狗、史鰌、公子荆、公叔發、公子朝曰：「衛多君子，未有患也。」

【一二】集解服虔曰：「禮，所以經國家，利社稷也。」